

Sèn Jan fèsc pumpenèr l'cher de la comunanza

En domenica ai 24, en Sèn Jan de Jugn, l'è festa grana per la comunanza de Vich, Poza e Pera. Festa religiosa e zevila, con na atenzion particolare a la Scolina



La Pieif de Sèn Jan.

Sèn Jan - La fujion de Vich e Poza tel nef Comun ge à dat luster a la frazion de Sèn Jan, cher de la neva realtà amministrativa ma da tempes veiores enche cher de duta la comunanza. I più de età se recorda canche de festa i jia a pe fin a Sèn Jan, te la Pieif per la messa grana, tel "ricreatorio", dovontà dapò Kinderheim e ades Sorastanza de la Scolina, e canche i jia te la Scolina, olache n'outa domesdi se binèa la "arlieves" con la monies Fies de la Madona de l'Aiut, te chel frabricat olache à troà sia prima "sozialisazion" generazions de picioi.

Chest an, te la prima festa de Sèn Jan de Jugn dō la fujion, chesta domenica inant mesdi la Pieif, l'piaz de la calonia (jā Piaz de Pien Comun de la Comunità de Fascia) e la Scolina dovontarà endō cher vif de la comunanza, ajache sarà la defilèda con la 2 Museghes, la Messa grana, i momenc ofiziali e dapò la vijita a la scolina, con mingol de festa (v. program apede).

La Scolina de Sèn Jan

La Scolina de Sèn Jan è stata fata sù acà bèleche 60 egn e jà da vèlch an se à vedù che l'è gran besegn de la meter a post. L'projet de restruturazion è pontà via l'an passà con l'president de l'Ent gestor Quirino Zulian, en cordanza con don Andrea, raprezentant de la Gejia Romano Catolica de Sènt'Ugèna, patrona del frabricat.


Ades a se cruzièr de l'portèr inant con gran gaissa l'è Alessandra Cloch, litèda al scomenz del meis de december 2017 neva presidenta de l'Ent gestor de la Scolina. Ela à vardà subito de tirèr ite la comunanza, percheche la deide per la pèrt de speisa che no è corida da contribuc publiche, ma enche percheche la jent de Vich e Poza posse sentir più "sia" chesta Scolina.

"Peisse che chesta - ne à dit Alessandra Cloch - sie la prima opera soracomunala che è stata voluda jai 60 egn da Vich e Poza ensem e la è stata fata da le doi comunanze chiò a Sèn Jan, proprio sul confin anter i doi pajes, n' muie dant che se tache a pissar o a rejonar de fujion di Comuns. Canche gio son dovontada

presidenta l'era jà stat fat l'projet definitif dai architec Ghetta e Tamion e l'era da jir inant con l'esecutif e l'apalt, per no perder i contribuc. La speisa de l'opera la è de 1.745.000 euro, de chisc 1.288.000 vegn finanzié da la Provincia, 350.000 è stac deliberé dal Comun de Sèn Jan e donca mencia 107.000 euro per scuerjer duta la speisa. Per poder binar ensem chisc scioldi è domanà che la jent de Poza e Vich la deide. Me sà giust perché chesta scolina l'è semper stat n'pont de referiment emportant per le familie, podon dir che l'è la seconda ciasa di bec, i passa chiò 7 o 8 ore en di per 5 dis en setemana, donca l'è fondamenta ge endrezar na strutura acolienta e segura."

En cont di lurieres, Cloch ne à dit che l'era stat pissà de bater jù l'frabricat e l'far sù da nef più en ite, ma la Provincia no à dat l'autorisazion. "Vegn smaorà la cojina e sot ite fat n'gran magasin - la ne à spiegà - daitè vegn mudà dute le aule e vegn fat i bagnes vejins per ogni seziun, cosci l'è più sori canche i bec à da jir te bagn e i è più sot control. Vegn mudà dute la strutura per vadagnar spazies e aer dut più funzional, ma l'frabricat l'veg demò pech più gran. Dapò vegn fat ujes e fenestre dut nef, l'isolament col "cappotto" e vegn metù sun cuert i tulins de soreie e chi fotovoltaiques per aer n'bon sparagn energetich."

L'projet perveveda enche de fèr n'post per i auti sot l'vidor per i bec, ma chest per costion de cosc cognarà vegnir sperlongià: "no l'era stat contejà tel cader economic - disc amò Cloch



L rendering de la restruturazion de la Scolina.

- e donca aon cognù cerner: o lasciar en dō i lurieres de la cojina e l'magasin, o chi de fora. Aon pissà che l'è miec fenir l'frabricat: vegnarà fat a na vida che dapò se posse aer l'azess di bec al vidor diretament da le seziun, i ujes endana i restarà seré fin canche no vegnarà uzà l'vidor e fat sot ite l'post per 7 o 8 auti, coche l'era pervedù."

Cognon sperlongiar i tempes percheche no aon na senta

Per chel che vèrda i tempes, Cloch ne disc: "volassane jir fora con la gara de apalt per la fin de jugn, ajache coi 4 de messal la Provincia à mudà i priesc e l'opera ne costassa 100.000 euro de più, per chest i projetis i è dō che i laora de pien. L'è pervedù l'an de lurieres e podassane scomenzar amò ches an, ma l'problem l'è che no saon olà meter i bec. Aon ceri dut entorn e no sion stac bogn de troar n'post che aesse le carateristiche domandade per na scolina: aane pissà a la calonia de Pera, ma la Federazion vel che i spazies vegne duré a na vida esclusiva per la scolina, e cosci menciass l'post per la catechesi e le altre robe de la comunanza. Ne resta la soluzion de la Scola popolar de Poza, che l'è pervedù che la tramude via Sèn Jan lō da le mesane, perché i è dalbon n' muie strenc e no i sà più olà i meter. Ampò i cogn spetar che i studenc del Liceo artistich posse jir te la scola neva: i lurieres se à entardiv e la popolar de Poza no se librarà dant da setember 2019. Donca noi cognon veder se podon istese far l'apalt ades, metan ite chest sperlongiamet tel bando."

Endana aboncont - disc amò Cloch - noi no speton che i scioldi ne vegne jù dal ciel, se dajon da far, enche co le familie aon endrezà desvalive scomenzadive, gio è prejentà l'projet ai conzer d'alcia de le doi Museghe de Vich e de Poza e la jent à responet n' muie dalvers, e tole l'ocajion per ge dir n'gran devalpai! Enche don Andrea l'è à dat jù e l'è binà ensem n'bel didament a le benediscion endana l' meis de mè e dapò ades aon endrezà la loteria, col sostegn de n' muie de hotie, firme e boteighe aon metù ensem dalbon de bie premies."

Chisc premies i vegnarà tiré fora proprio l' di de Sèn Jan, te piazal de la Scolina dō messa grana, e te chela ocajion vegnarà avert i ujes de la Scolina e duc podarà jir ite a la veder e se recordar de canche i era picioi o de canche i aea laite i fies o nevoes.

Lucia Gross

Onor a Sèn Vit

La comunanza de Vich à festejā l'patron con la procescion e la messa te la geja de Sènt'Ugèna, e con n'bel concert la sera dant



N moment del concert de la Coralina de Gnosca.

Vich - Ai 15 de jugn l'è la festa de Sèn Vit, che l' stèsc sora l'paise de Vich. Tel temp la festa era jita mingol a se perder, fosc per la vejinanza de data con Sèn Jan, più "conscidrà" da la Gejia, ma la devozion de la jent per chest sènt joenet no se à smendrà, e ti ultimes egn la sègra de Sèn Vit à endō ciapà pe. Chest an ai 15 l'era de vender e la scomenzadives en onor del Sènt patron se à dejout te 2 momenc desferenc, en sabeda ai 16 con n'bel concert e en domenica ai 17 con la procescion e la messa te la geja de Sènt'Ugèna.

La Coralina de Gnosca

En sabeda sera te la sala del Comun a Vich se à podù scutèr l'bel concert "Cianties a Maria e Cianties de l'enema", portà dant da la Coralina de Gnosca.

Pecià che per via del repertorie, demò en part sacral, chest cor dut de eles ruà da la Svizzera no l'è podù ciantèr te la geja, sot i reouc che aessa valorisà amò de più la oujes melodioses de la ciantarines. Ampò l'publich à podù aprijèr n'concert dassen bel e particolèr: sot la vida de la maestra Francesca Gianoni la Coralina à portà dant cianties de devozion a la Madona de autores cognosciui desche Haydn, Brahms, Massenet e Saint Sàens e dapò cianties profanes de etres autores, anter chestes toc cognosciui del repertorie de cores da mont de ic, desvalives de Bepi de Marzi.

L'è stat proprio De Marzi a arvejiner ches cor a noscia val. L'cognosciu muzist e componist venet defat l'è armonisà più che una de sia cianties per oujes feminines: endèna l'concert se à podù scutèr anter l'auter "Sanmatio", "Improviso" e "Jola", e dapò l'ge à proponet a la maestra Francesca Gianoni de ciantèr enche "Soreghina" de Aladar Janes, ciantia cognosciuda e ciantèda da egn enche dal Cor de la Sat, che l'è l' test fascian e che a De Marzi ge piès n' muie. Per

saer la dreta pronunzia, De Marzi ge à dat l'contat col diretor de l'Istitut ladin Fabio Chiocchetti, e da ches se è rué a l'eniv per ches concert, endrezà apontin da l'ICL adum con la Pro Loco de Vich.

La Coralina à ciantà te desvalives lengac, duc i 4 lengac ofiziali de la Svizzera (todesch, franzous, talian e romanc), e dapò enche per latin te la cianties sacrales e per ladin, apontin con Soreghina. N repertorie de spes de gran dificoltà, portà dant con braura e pascion e vidà con capacità straordenà da la maestra Gianoni, che à enche sonà l'flaut te n'intermez con na solista e l'compagnament de Nicolas Mottini al piano. I l'ong batiman del publich, enche dō l'bis, à sotlineà l'aprijiamet per chesta bela proponeta de musega fora de anter, che à permetù de scutèr - a tropes faile per la prima outa - enche cianties classiches del repertorie di cores da mont portèdes dant da n'cor de eles.

Procescion e Messa sun Ciaslir

En domenica n'bel soreie ciut à compagnà la procescion col gonfalon e la statua de Sèn Vit enscin sun Ciaslir. Te la geja de Sènt'Ugèna, olache n'utèr l'è dedicà apontin a Sèn Vit, don Andrea Malfatti à ofizià la messa ensem con don Luciano Mainini e l'è recordà la feura de ches sènt joenet, che ne disc che la fe no l'è na roba da veies, e enche la feures de Crescenza e Modesto, per ne dir che l'è prum de dut i gregn che pel ge passèr i drec valores ai fies o ai bec che i à apede, per i fèr crescer forc e segures te sia fe. Dō messa, per endrez de la Pro Loco e de la voluntadives de Vich, fora de geja no l'è mencià l'moment convivial con de bogn grostoi e vèlch da beiver, con na viva a Sèn Vit. (lg)

Deplù fotografies sun www.lauscit.it



La domenica l'è stat la procescion e la Messa sun Ciaslir en onor de Sèn Vit.

L program de la festa

Chesta domenica ai 24 de jugn vegn fat gran festa per Sèn Jan. En Sèn Jan de Jugn, festa veiora de secui, sarà ocajion per zelebrèr la festa religiosa per la Pieif de Fascia, ma enche de fèr festa zivila per peèr via ensem col nef Comun de Sèn Jan, che tol inom proprio da la Pieif.

Da les 9.45 la doi Museghes de

Vich e de Poza les pearà via, la prima da la Piazza de Vich e la seconda dal piazal de la Coprativa. Da le 10 les se bina dedant a la Ciasa de Pausa olache les farà na sonèda. Dō pearà via la procescion fin a la Pieif, olache da le 10.30 vegnarà ofizià la Messa grana.

Dō messa sarà i intervenc de la autoritèdes e la Union de la Vetes e

dapò duc se tramudarà te vidor de la Scolina de Sèn Jan, olache vegnarà tirà fora i pesé de la loteria, vegnarà sport mingol de aperitif e la Scolina verjarà si ujes, a na vida che duc i posse jir ite a la veder. Duta la comunanza è envièda de cher a tor pèrt. A Poza, Pera e Vich en domenica doman no vegnarà dit de altra messes.